

SECONDA SESSIONE URDINARIA DI U  
2021  
RIUNIONE DI U 30 DI SETTEMBRE È DI U 1<sup>MU</sup>  
D'OTTOBRE 2021

2EME SESSION ORDINAIRE DE 2021  
REUNION DU 30 SEPTEMBRE ET 1<sup>ER</sup>  
OCTOBRE 2021

2020/O2/033

**REPONSE DE MONSIEUR LE PRESIDENT DU CONSEIL EXECUTIF  
A LA QUESTION DEPOSEE PAR MONSIEUR SAVERIU LUCIANI  
AU NOM DU GROUPE "AVANZEMU"**

**OBJET : Lingua Corsa**

Rapidamente à ringraziavvi per a vostra quistione, Caru cullega.

Cunniscite bè stu duminiu postu ch'è vo site statu incaricatu durante a mandatura passata accant'à a vostra funzione di Presidente di l'Uffiziu Idrolicu, di a quistione di a lingua corsa. Dunque ùn riveneraghju micca nant'à ciò chì hè statu fattu incù voi, incù i servizii, i punti pusitivi, dinù e debulezze certe volte di a nostra azzione ch'emu sempre circatu à parà, e debulezze pè rinfurzà a nostra mandatura. À u livellu puliticu è essenziale è ùn riveneraghju micca nantu a primura maiò ch'ella ripresenta a piazza di a nostra lingua chì ghjè parte di u nostru esse cullettivu è di ciò ch'è no simu in tantu chè populu.

Pè risponde à e vostre quistione, di manera cuncreta, nanzu di parlà di ciò ch'è no circheremu à fà insemi durante a mandatura. L'affare di e sciffre è di l'effettivi, a sapete bè chè tutti l'anni straziemu incù u retturatu per ottene ste sciffre, chì ci dicenu chè ùn sò ancu validati da i so servizii, ciò ch'è no circhemu à fà è a sà ancu Josepha postu ch'ellu c'era a lingua d'una parte è a cultura, chì ghjè un travagliu glubale è cumunu, ùn ci pudemu micca rimette e manu à u retturatu pè sapè, ci vole à travaglià in direttu incù tutti l'attori, incù tutti l'insignanti per circà à sapè u scartu ch'ellu ci pò esse trà e sciffre ufficiale è a realtà di l'effettivi è di a pratica inde u sistemu educativu. Questu pè e sciffre.

Secondamente pè u cuntrattu di pianu di modu generale sapete chè ùn simu micca i soli, e regione di drittu cumunu sò in listessa situazione, avemu un prublema glubale incù u governu. Pè ciò chì tocca a piazza di a lingua corsa, a sapete l'avemu fatta insemi è avemu fattu a scelta è di sicuru, hè mantinuta, di duppià è insistu, u sforzu finanziariu postu chì inde u cuntrattu chì si finisce trà 2015 è 2021, aviamu cunsacratu 17.5 milioni per a lingua è sapete chì ghjè un finanziamentu à paru trà Cullettività è Statu. Dunque 17.5 milioni, 8 è 7 di a parte di a Cullettività è avemu dumandatu è ottenutu nant'à u principiu ch'ella creschi sta somma à 30.2 milioni incù 15.6 milioni di a parte di Cullettività di Corsica. Dunque à u livellu finanziariu duppiemu mà al di là di u quantitativu ciò chì c'impreme hè u qualitativu, è què ci permette dinù di parlà

per esempiu di a furmazione inde u primu è po inde u secondu gradu. Sapete chì avemu dumandatu, senza ottene, una valutazione di ciò chì hè statu fattu ghjè impurtantissimu, à u livellu di a metudulugia ci vole à rinforzà u nostru travagliu, ancu s'ella hè stata fatta, ma ci vole à rinforzà i segni pusitivi à tutti quelli ch'aspettenu assai di noi, vogliu parlà di l'insignanti, di l'associ di i parenti, di l'associ chì travaglianu nant'à u terrenu.

Nant'à a quistione di a pratica di generalizà l'immersivu publicu, simu ind'e listesse pusizione, noi ùn circhemu micca à oppone u publicu è l'iniziative assuciative simu impegnati direttamente nant'à u travagliu magnificu chì ghjè statu fattu da Scuola Corsa pè apre ste duie scole immersive in Biguglia è in Bastia. Ma ùn ci vole micca chì s'iniziative assuciative sianu una scusa o venghinu à addibulisce a dimarchja di l'immersivu inde u publicu è quessa custi hè a nostra primura, l'aghju ripetuta direttamente à u primu ministru Jean Castex, postu chì a sapete avemu avutu una riunione cù l'associ di sfarenti rigione di Francia chì travaglianu nant'à l'immersivu associativu, aghju dettu è ripetutu chì pè noi l'immersivu linguisticu era à tempu quellu di u serviziu publicu di l'insignamentu è quelle d'iniziative assuciative ch'è no sustenimu.

È po custi dinù a sapete, l'immersione linguistica v'è al di là di l'immersione di u sistema educativu ancu s'ellu hè un puntellu maiò è què ghjè tutta a pulitica di diffusione di sparghjera di a nostra lingua di a sucetà chì ci toccherà insemi à rinforzà.

Quartu è ultimu puntu, quellu di cuufficialità, chì ghjè a prima battaglia è sapemu chì avete ripetutu a manera di vede e cose, sapemu bè chì custi, ci hè un'opposizione fundamentele trà u nostru parè è e nostre cunvizione è quelle chì stanu sempre à u core di a pratica è di l'ideulugia di u Guvernu è di u Statu.

A cuufficialità, travagliemu per esempiu incù Euskadi. Sapete, ch'è no avemu passatu una cunvenzione di cuuperazione per circa à vede al di là di l'aspetti ghjuridichi cumu facenu elli inde u so paese per sparghje a lingua, circhendu à ripiglià ste ricette ind'è noi è al di là ci vulerà à cuntinuà, postu chì avete fattu riferenza à una mudificazione di a custituzione è s'è no vulemu un statutu glubale d'autunomia è un statutu di cuufficialità sapemu bè chì ci vulerà à passà pè una mudificazione di custituzione. Ghjè un chjassu longu, petricosu, ma simu annant'à stu chjassu dipoi anni è anni è ùn rinfiataremu micca.

Finiscu dicendu chì, ci hà da vulè insemi, micca solu u Cunsigliu esecutivu, l'Assemblea incu tutti l'attori di mandature à vene.

Rivengu nant'à ciò ch'aghju dettu nanzu, sia una mandatura chì ci permette di fà insemi un passu maiò per a nostra lingua, un passu in tutti i duminii, inde a scola di sicuru ma inde a sucetà sana, è stu travagliu custi l'avemu da fà speru insemi inde i mesi è l'annate à vene.